


ASÚNTU NE'EBÉ PRESIZA TAU ATENSAUN

- ▶ Asaun violénsia ligadu ho fronteira (5)
- ▶ Alku/tua impaktu iha violénsia (11)
- ▶ Juventude ho violénsia (10)
- ▶ Disputa rai / hadau malu rai (4)
- ▶ Ema deskoñesidu ho violénsia(4)

TOTÁL INSIDENTE NE'EBÉ RELATA KADA DISTRITU


Distritu	Insidente
Lautem	6
Covalima	1
Dili	5
Vikeke	5
Aileu	1
Ainaro	
Ermera	1
Baucau	5
Manatuto	2
Manufahi	5
Oekusse	8
Likisá	3
Bobonaro	1
Totál	43

TOTÁL INSIDENTE NE'EBÉ REPORTA HUSI OUTUBRU – 2012 NO OUTUBRU 2013



Bazeia ba analiza dadus hatudu katak insidente tu'un iha iha fulan juñu. Bele hetan sumariu insidente klaru liu iha www.belun.crowdmap.com

KARATERÍSITIKA INSIDENTE FULAN OUTUBRU 2013



ASAUN VIOLÉNSIA LIGADU HO FRONTEIRA

Tensaun konfliktu entre comunidade Naibenu (Indonézia) no comunidade Lakufaan (Oekusi Timor Leste)

Distritu Oekusi Komunitade Naibenu ne'ebé komposta husi Suku ha'at hanesan Suku Suin Sea, Suku Bakitolas, Suku Benus no Suku Manamas hala'o asalta fiziku, sunu uma tolu (3), ema kanek todan (1) no kanek kma'an mane nain hitu (7). Sorin seluk, JPS ka Junction Point System ne'ebé sai nu'udar sinais fronteira entre nasaun Timor Leste ho Indonézia mós hetan estragus. Feto ho labarik ki'ik sira comunidade Lakufaan halai ba buka fatin ne'ebé seguru ba sira ninia moris. Maske nune'e sira nafatin hela ho trauma no paniku ba situasaun refere. Impaktu sira ne'e hotu mak nu'udar rezultadu ne'ebé iha durante asalta fiziku ne'ebé hala'o hahu husi data 14-15-16-25-28 Outubru 2013 iha Lakufaan Oekusi.

Asaun konkretu ba resposta insidente depois insidente ne'e Ministériu Solidariedade Sosiál (MSS) distribui kedas apoiu humanitaria ba uma tolu, ne'ebé hetan sunu. Ministériu Saude liu husi ospital referál distritu Oekusi halo ona tratamentu saude ba membru comunidade Lakufaan ne'ebé hetan kanek todan. No tuir mai mós Diretor Advokasia Multiseitorál husi Ministereiru Negosiu Estranjeiru no Kooperasaun/MNEC, Sr. Arnaldo Suni halo konsultasaun ba membru Tentara Nasionál Indonézia (TNI) ho Administrador subdistritu Naibenu Kefamenanu (Indonézia) hodi halo karta ba administrador subdistritu Pante Makassar no deskrebe pedidu sira hodi ba dialogu. No Kordenador Belun distritu Oekusi serbisu hamutuk ho Rede Prevensaun no Responde ba Konfliktu (RPRK) subdistritu Pante Makassar hasai ona konvite ba enkontru nivel distritál hodi identifika abut violénsia no dezenvolve aksaun ba oin. Atu antisipa insidente seluk labele akontese tan entre comunidade rai rua ne'e Sekretáriu Rejiaun Oekusi vizita fatin akontesementu no halo konsolidasaun ba comunidade aldeia Lakufaan hodi ses a'an husi violénsia ne'ebé akontese. No mós aumenta tan membru UPF 12 ba postu Polísia UPF hodi suporta halo patrulla iha liña fronteira.

Solusaun ba Insidente fronteira

Dalan sira ba responde insidente ne'ebé akontese durante fulan Outubru nia laran bele dehan efetivu teb tebes. Maibé, importante liu mak asaun prevensaun ba konflitu atu sidadaun Timor ne'ebé hela iha liña fronteira labele sai tan vítima. Insidente ligadu fronteira akontese deit iha Oekusi (5).

IMPAKTU ALKOL LIGADU HO ASAUN VIOLÉNSIA

Tua lanu, joven mane ida sona kanek ninia aman rasik

Distritu Baucau Joven mane ida ba hemu tua lanu hafoin fila mai uma deskute malu ho nia aman konaba fetosan – umane. Joven mane ne'e mós tarata ninia aman maibé tanba ninia aman la simu tarata hirak ne'e no lakohi deskute malu ho nia oan maibé oan kontinua trata nia aman no nia aman hakarak atu basa nia oan maibé tanba oan ho kondisaun lanu. Nia oan dada nia aman no uza tudik sona nia aman husi kotuk no rezulta nia aman hetan kanek todan iha parte kabun, nomós família lori kedas ba ospital no mós família sira kontaktu PNTL hodi kaptura nia oan no hatama iha sela Polísia distritu Baucau. Tanba tua lanu nune'e halakon mós hanoin rasionál sira no konsiensia ser humanu nune'e afeita ba oan mane ida ne'ebé sona kanek ninia aman rasik. Wainhira insidente akontese, fator ne'ebé sai nu'udar sasukat ba motivu ema ruma hala'ó konflitu mak hanesan fator, desempregu no moris iha kondisaun mukit no interese seluk tan ne'ebe kauza ba konflitu. Insidente ne'ebé ligadu ho alkol akontese iha distritu; Covalima (1), Lautem (2), Dili (1), Likisá (1) Baucau (1), Same (4) Oekusi (1).

ASAUN VIOLÉNSIA ENTRE JUVENTUDE

Joven mane ida uza droga no oho mate ninia kolega diak
DISTRITU DILI - Metiaut, Insidente ne'e akontese entre joven mane nain rua ne'ebé iha relasaun kolega. Durante ne'e sira nain rua sempre ba han hamutuk, vizita malu no sempre la'ó hamutuk iha tempu livre. Tanba deskoñfia katak nia kolega ne'e hala'ó hahalok la diak ba ninia membru família balun. Hodi nune'e nia la gosta joven ne'e no nia hala 'o asaun tentativa ba oho nia kolega ne'e dala tolu ninia maibé la konsege no ba dala ha'at nia laran joven ne'e konsege oho duni ninia kolega ne'e ho tudik sona kabun, kotuk laran, kabasan no liman sikun no joven mane ne'e mate kedas iha fatin. Hafoin insidente ne'e suspeitu hetan kapturasaun husi PNTL eskuadra Bekora no submete ba investigasaun no rezultadu investigasaun hatudu katak joven mane (suspeitu)

uza mós droga tipu ganja ne'ebé utiliza ho sigáru. Suspeitu tuir ona prosesu investigasaun no oras ne'e iha hela prizaun Bekora hodi hein kontinuasaun ba julgamentu, no mate isin sei iha hela ospital Guido Valadares ba prosesu autopsia no seidauk lori fila ba família ninia uma. Liu tiha loron hirak joven mane suspeitu ne'e oho a'an iha komarka Bekora ho dalan tara a'an to'o mate. Insidente seluk relasiona ho asaun violénsia entre joven akontese iha; Distritu Baucau (2), Distritu Bobonaro (1), Distritu Lautem (2), Distritu Vikeke (2), Distritu Dili (2), Distritu Likisá (1).

ASAUN VIOLÉNSIA IHA DISPUTA RAI

Insidente ligadu ho violénsia tanba disputa rai

Distritu Vikeke oknum Xefi aldeia ida hakarak hadau fali comunidade ida ninia rai, maibé rai nain lakohi fo'ó no la simu ba atitude husi oknum Xefi Aldeia refere tanba ne'e mak nia koalia hasoru oknum Xefi Aldeia ne'e no ikus liu to sira nain rua baku malu no parte rua kanek hotu iha rentos. Kazu ne'e tenki hetan investigasaun husi autoridades relevantes hodi garante katak labele akontese utilizasaun sala ba puder ka pekulatu hodi fo'ó presau ba comunidade no hadau comunidade ninia rai. Insidente seluk ne'ebé ligadu ho disputa rai akontese mós iha distritu sira hanesan; Distritu Dili (1), Distritu Vikeke (1), Distritu Oekusi(1), Distritu Lautem (1).

ASAUN VIOLÉNSIA LIGADU HO EMA DESKOÑESIDU

Ema deskoñesidu ta'a kanek membru F/FDTL

Distritu Dili, oras 20:00 kalan, iha Aldeia 03, Suku Fatuhada, Subdistritu Dom Aleixo, asalta fiziku husi ema mane deskoñesidu ida halo ba membru F-FDTL ida. Ema deskoñesidu ne'e ho motor halai tuir membru F-FDTL ne'e husi kotuk no derepenti ema deskoñesidu ne'e losu katana hodi ta'a membru F-FDTL ne'e iha parte liman karuk no kanek todan. Insidente ne'e PNTL hasoru direita ho membru F-FDTL no informa katak la koñese ema ne'ebé ta'a nia tanba ema deskoñesidu. Tipu violénsia ho ema deskoñesidu sai nu'udar ona tradisaun ba asaun violénsia iha Distritu Dili. Wainhira parte kompetente hanesan PNTL la deskobre tipu ema kriminozu ho tipu ema deskoñesidu ne'e nu'udar risiko ida ba vida comunidade iha Distritu Dili. Insidente ligadu

ho ema deskoñesidu akontese iha; Distritu Baucau (1), Distritu Dili (1), Distritu Likisá (1), Distritu Vikeke (1).

INSIDENTE SELUK NE'EBÉ AKONTESE IHA OUTUBRU

Katuas ida sona mate ninia banin feto to'o mate

Distritu Ermera, wainhira feto ferik ne'e toba hela iha uma laran ho kondisaun moras todan no nia katuas oan ba lere hela to'os, mane katuas ida, ne'ebé nudar mane foun ba ninia banin ninia uma no hala'o violasaun seksuál hasoru ninia banin feto. Depois halo tiha relasaun seksuál, feto ne'e hateten katak "hau nia katuas oan mai hau sei kesar" iha momentu ne'e mane ne'e losu kedas ulsuku iha ferik ne'e nia fu'uk no sona iha kakorok depois foti tan ai dona hodi baku tan iha hasan sorin-sorin to'o mate. Mane ne'e halai husik hela nia hena iha uma laran, wainhira nia laen fila husi to'os mai hare nia fe'en mate ho kondisaun hanesan ema oho entaun nia la'en ba hato'o kedas ba Xefi Aldeia nomós Xefi Suku no informa ba Polísia posto Railete. Iha kalan ne'e kedas Polísia ba iha fatin akontesimentu no identifika suspeitu hodi halo kapturasaun ba suspeitu no hetan ona pena prizaun durante tinan 24. Insidente sira ne'ebé ligadu ho insidente seluk akontese iha; Baucau (1), Ermera (1), Aileu (1), Oekusi (1), Vikeke (1), Manufahi (1), Manatuto (2), Lautem (1)

ATIVIDADE PREVENSAUN KONFLITU NO RESPONDE BA KONFLITU

Aktividade Nivel Nasionál Aktividade ne'ebé hala'o ona husi ekipa AtRes mak hanesan; Iha dia 20- 27 Outubru 2013 Hala'o atividade Round Table Meeting/Enkontru Meja Kabuar ho topiku " Saida mak Juventude halo hodi kontribui ba dezvoltimentu lokál" ba juventude iha Distritu lima; Distritu Ermera, Distritu Aileu, Distritu Baucau no Distritu Dili.



Orador ba enkontru Meja Kabuar iha Distritu Dili. Sekretariu Estadu SEFOPE, Prezidente CNJTL, Prezidente Komite 12 Nov, BELUN

Aktividade Nivel Subdistritu Ekipa DAMME implementa fundus ki'ik iha Subdistritu Ermera, Subdistritu Laulara, Subdistritu Remexio, Subdistritu Alas no Subdistritu Nain Feto no Bazartete. Sorin seluk, Ekipa DAMME mós hala'o Kapasitasaun: Treinamentu ba Parseiru Rede Prevensaun no Responde ba Konflitu (RPRK) Suai Vila, Tiliomar no Zumalai.

Ekipa MRD/Mediasaun Rezolusaun no Disputa, fasilita treinamentu iha distritu Manatuto konaba mediasaun ba Staff DTPSC no Konsellu do Suku mai husi Suku 6 hanesan Suco Sau, Aiteas, Ailili, Ma'abat, Cribas no Iliheu iha data dia 23 – 25 de Outubru de 2013.



Partisipantis sira rona esplikasaun iha treinamentu

REKOMENDASAUN

Ministériu Negosiu no Estranjeiru no Kooperasaun

- Kontinua hala'ó negoziasaun ba governu Indonézia atu finaliza lalais markasaun liña fronteira entre Timor Leste no Indonézia no fó hatene comunidade sira kona ba programa ni rezultadu.

Sekretáriu Estadu Seguransa no PNTL

- Aumenta tan membru Polísia UPF iha liña fronteira atu bele antisipa ba insidente no asegura mós infiltrasaun comunidade nasaun seluk tama Timor Leste.
- Aumenta orsamentu ba hakbí'it divizaun PNTL spesifikamente intelejente atu bele deskobre autor krimes sira ne'ebé durante ne'e seidauk kaptura husi PNTL iha distritu Dili no distritu seluk iha Timor.

Ministériu de Saude

- Hala'ó seminariu ba juventude sira kona ba oinsa moris saudável ho hado'ok a'an husi alkohol ka tua.

Ministériu Solidariedade Sosiál

- Fo'ó assistensia no ajuda humanitaria ba vítima sira ne'ebé kauza husi konfliktu fronteira entre Komunitade Aldeia Lakufoan, Suku Costa, Subdistritu Pante Makasar, Distritu Oekusi.

Sosiedade Civil no Igreja

- Estabelesimentu grupu atendimentu ba konselu familiar iha comunidade nu'udar dalan alternative ba prevensaun konfliktu.

Sekretáriu Estadu Terras e Propriedades

- Presiza hala'ó rekrutamentu no kapasitasaun ba vokál point/mediador kada Suku iha Timor laran tomak atu bele fasilita mediasaun ba insidente sira ligadu ho hadau malu rai, problema baliza no seluk seluk tan.

Sekretáriu Rejiaun Autonomia Oekusi

- Hala'ó Aprosimsaun ba dialogu entre comunidade Subdistritu Naibenu (Kefamenanu Kupang Indonézia) ho comunidade Aldeia Lakufoan, Suku Costa, Subdistritu Pante Makasar, Distritu Oekusi
- Organiza eventu amigável entre comunidade rai rua Pante Makasar ho Naibenu atu hametin relasaun diak no prevene insidente iha futuro.

Karik presiza atu konfirma kona ba konteiuudu tomak revista situasaun fulan Outubru 2013, ita boot sira bele kontaktu mai :Maria Marília O. da Costa: Jestor programa AtRes via email bylah.belun@gmail.com ka via telemovel (+670 77276671). Pedro de Araújo dos Santos - Ofisiál Política Públiku. pedroa.belun@gmail.com. Telemóvel (+670 77001421)